

靈
芬
館
詩
話

靈芬館詩話續引

余所輯詩話十二卷未及竟也古雲襲伯見而好之卽爲付梓時時一二友人以篇章見質或當時所及見者久漸遺忘近又得之如覩故物輒下筆不能自休今年三月自袁浦還魏塘敝門無事繙閱故篋所儲又得王君東圃魏君半石黃君子未各以其鄉之老儒宿學如李圃隱魏水邨暨余所舊識王修竹諸君之詩見眎欣然爲錄其尤者名章秀句罄翰斷編非敢謂能傳其人亦區區發潛閨幽之微愜也續有所得當次第編之不復限以卷數耳戊寅穀雨日蓬菴書於第一功名閣

靈芬館詩話續卷一

吳江 邵礪 祥伯

樓攻媿謝陳表道惠米纜詩云江西誰將米作纜捲送銀絲
光可鑑仙禾爲餅亞來牟細翦曝乾供健噉如來螺髻一毛
拔卷然如薑都人髮新弦未上尚盤盤獨繭長纜猶軋軋詳
其形似殆如今索麵糲子之類特以米爲之耳又云年來風
痺忌觸口厭聞來力勅正整乃用山谷口令嘲人來日喫蒸
餅之語見宋人說部

攻媿題汪季路家藏吳彩鸞唐韻後詩法言初爲此韻時贗
裒文字覺後知寧知遂經謫仙手諱字曾闕民與基後有跋
云陸法言於仁壽元年成切韻五卷比前人韻集韻略音譜
等書已不羣矣天寶十載孫愐唐韻最著今世所行廣韻則

景德祥符重修遂至二萬六千一百九十四言而集韻又在
其後今彩鸞所書名曰切韻又首書法言之序傳記誤曰唐
韻云云按此則彩鸞所寫之本宋末尚有流傳爲樓公所親
見其爲切韻而非唐韻審矣亦可以正從前之譌又有跋吳
彩鸞玉篇云今玉篇惟越本最善末題會稽吳氏三一孃寫
問之越人無能知者豈亦彩鸞苗裔耶則彩鸞又嘗寫玉篇
矣

補續高僧傳道濟號湖隱又號方員叟臨海李都尉文和遠
孫受度於佛海禪師居靈隱後居淨慈狀貌風狂人稱濟顛
按濟顛事俗語不實流爲丹青其可傳者尠矣洞霄詩集載
其游洞霄宮一詩沈鬱蒼秀非學語禪和子可及如入門氣
象雄金碧欺兩眸彈碁古松下啼鳥聲相酬坡翁昔賦此刻

石紀舊遊谿山增偉觀萬古傳不休云云又偶題云幾度西湖獨上船篙師識我不論錢一聲唳鳥破幽寂正是山橫落照邊是善知識語亦是詩人語今之貌爲顛狂而實一無所解詩又俚俗妄援濟師以自標置而一二無識士夫謬爲附和此不識字人讀三國六朝演義者所爲可一噓也

薺蘭采後煮湯待纛先剝外之蒙茸者俗謂之薺蘭衣宋姚寅養蠶行小姑促湯嬈剝紕嬉嬉始覺雙眉展然則當作紕字也

近世搬演戲法於古無聞漢世西域眩人吞刀吐火則實有幻術似亦非今之以捷疾誇伎者惟墨客揮犀載丁晉公與夏英公會晏伶人有雜手伎名藏擲者在焉夏作一詩云舞拂跳珠復吐丸遮藏巧伎百千般是殆其倫矣

志乘之書凡涉神仙奇詭類入外編抑語怪而謹史筆也然
苟文人集中有可資證佐者於紀載爲有援据攻媿集楚詞
一體有雪谿仙隱一詞序云讀叢桂堂記而知雙流宋氏之
盛觀登科記而知四川類元正仲之名忽過余於寂寞之濱
問其所以來則懷閩風之綬訪其大父閩中君雪谿之仙踪
也 殿板有案語云寧波府志宋畊號雪谿世家雙流紹興
中爲閩中令後仙去其孫德之聞其在四明來訪至雪竇山
爛平山顛果見丹竈而終不得畊所在乃置祠其上而歸云
云得志文始解詞中所云其遂蟬蛻塵埃而仙耶其亦肥遯
而隱於四牕之幽耶之語然非攻媿此文志乘亦何所徵信
耶詞又有云青櫺兮實繁莎羅兮花稠鞠侯兮相與羣白鵲
兮嘯其儔案語云櫺鞠二字本關陸龜蒙四明山詩小序云

有青櫺子味極甘有獖謂之鞠侯據此補入可知譬校遺文
非博極羣書未易易也正仲殆德之之字

金仲蓮舍人與余爲昆弟交生平劬書媚學以文字友朋爲
性命平時相見劇譚縱論目無餘子顧獨兄事余且極傾倒
拙詩以爲一時無儷居恒不甚爲詩強之始一下筆又輒自
嫌棄去自出都後間闊十餘年故見其詩甚少今歲屏當大
牛篋見有君手書和舡山太史驛柳四首恍對故人遂爲灑
涕錄之消磨歲月幾陰晴來往征車苦送迎搖落尚思垂手
舞雨風偏作斷腸聲須知無語臨荒店不解含愁傍禁城記
取長條休盡折東君一例費經營顧影誰憐舊布衣昔年手
植又成園鶯花已過愁難遣雨雪漸多胡不歸古戍盤鴉濃
似墨長堤走馬去如飛感君爲我回青眼臨水三椽約共依

一尊曾與餞斜陽惹我征愁入醉鄉斷夢不隨天外月柔絲
欲傲鬢邊霜迎秋已見婆娑影閱世真如傀儡場觸起十年
離索感曉星零亂不成行頻年商調按伊州攀折無端起暮
愁枉把關山憐過客忍將泉石換封侯春歸梁苑誰先賦影
入隋堤各自流畢竟耆卿能顧曲曉風殘月十分秋君有巴
江送別圖七古一章語多感激豪宕太長不載

江西歐陽志元莖蘭畦尚書所取士也最好爲詩時有佳製
其和驛柳詩亦在篋因錄其二舊題壁處長苔衣濯濯新栽
碧又聞遠道故人還折贈高樓思婦寄當歸五更騎馬月初
落一路嗁鶯花亂飛流轉韶光郵共速怪他青眼尚依依亭
烏墩鷺是何州憐爾天涯亦自愁鬱鬱本名獨搖樹勞勞誰
拜老閒侯客心賸欲憑絲綰別意那堪復水流醉裏更煩指

列宿酒旗星好不知秋余遊江西與志元相見節署有題余
江行日記二絕今刻於卷端

稼庭痛其兄之亡補寫一圖作兄弟對牀意取子由詩誤喜
對牀尋舊約不知漂泊在彭城語名曰誤尋舊約圖一時題
句甚夥余昔曾作二律失稿未編入集今年稼庭將彙刻成
帙屬余爲序重覽舊作如遇故物卽錄於此以補之云蘇石
鋪苔逕狂花滿小園東西兄弟屋生死脊令原易落亡琴淚
空招剪紙魂自憐感舊者馬策又搥門令弟急難甚從前或
不知驚心遭慘禍回想到平時嘔血持家計追魂慰夢思勉
之行自愛有寡嫂孤兒

秦少游國士無雙而終身厄塞然名在天壤後人追慕歎息
固非厄之者所能掩也嘗爲定海主簿有淮海樓鶯花亭是

其遺跡芮國器一詩云人言多伎亦多窮隨意文章要底工
淮海秦郎天下士一生懷抱百憂中言固可以若是悲夫余
昨雨中過秦郵追和其千秋歲詞云煙波無外畫鷁因風退
汀蓼亂陂荷碎寄愁紅玉盃繫悶青羅帶眉黛遠楚山如畫
偏相對文好游從會世大才能蓋人不見臺空在千秋風調
近一晌心情改仙夢杳弄珠去也星沈海

紀曉嵐宗伯灤陽續錄記其座師介野園 恩榮晏詩云鸚
鵡新班晏 御國摧頽老鶴也乘軒龍津橋上黃金榜四見
門生作狀元自注云鸚鵡新班不知出典當時擬問公竟因
循忘之按元遺山有探花詞五首其一云禁裏蒼龍啓九關
殿前鸚鵡喚新班沈沈綠樹鞭聲遠嫋嫋薰風扇影閒是此
公所本也然去一喚字於理未協殆喜新好奇之過歟

余嘗作嚴瀨弔嚴先生文大意以爲光武與先生同學志趣必所素識光武撥亂拯時其氣度畧同高祖而未暇有志於三代之治而先生之道不容少貶此先生所以不畱而光武亦不彊之畱也後見宋人徐大正一詩爲東坡所賞者其意正與予同詩云光武初從血戰回故人長短尚論材中宵若起唐虞興未必先生戀釣臺

舊傳子陵爲梅福之婿詩人多入之吟詠然未見所出梅礪詩話云永嘉徐照題子陵釣臺云梅福神仙者新知是婦翁子陵爲梅公壻傳記不載詩必有所本以上皆詩話然則首用此事者爲道暉梅礪亦不詳其出當俟博識者明之

錢唐高心畬名樹穎負振奇之志抱壯游之懷贈頓名場羈棲幕府故爲詩多苦語然和平恬雅無怨尤之色亦無志微

瞧殺之音令嗣飲江植以其集見示得盡厲目六十自壽出門示家人各詩皆格老旨深自在流出七言更極風神駘宕之致木芙蓉云殘荷瑟瑟戰風涼卻讓夫容獨拒霜見慣應輸鷗鷺眼一年兩度看紅粧車中假寐云支頤一夢笑黃梁漫道驅馳盡日忙爭識忙中有閒趣軟紅塵裏黑甜鄉移居詩云水漲平橋一棹回更從蔣徑闢蒿萊營巢真箇忙於燕卻趁今朝社日來他五言如雨泊瓜州云山是隔江碧鐙從極浦紅聞雁云酸風吹積雪孤月墮虛煙七言如元夕潞河客中云三五夜中閒翫月四千里外各懷人和人云喜陪座上雄譚客怕讀鐙前細字書皆嘔噓於唐宋之間而自嫺風調又有書蘿邨女史西園題壁詩後末首云紛紛遊冶競新粧若箇能從弟子行我向花前誦詩句卻愁天壤有王郎附

錄元作其第一第三云靜掩蘭閨不染塵松雲蘿月是前身
扁舟忽問春江渡暫作天涯羈旅人客窗夢斷曉慵粧翠幃
移來伴雁行蘭質不隨香絮落春風愁殺冶遊郎心畚當亦
不知女郎何許大故有上句耳

竹垞檢討閑情詩本三十首今集中祇存八首梅里馮君登
府搜緝曝書亭遺詩得其石樓集手抄本完好可讀者尚得
十三首似微不及集中之作然零珠碎玉尤可寶貴今錄其
四首四角車幡夾道飄青驄松下好相邀金徽有意憐司馬
銅雀何難貯小喬天上長河愁脈脈雲閒明月路迢迢秦臺
綵鳳無消息腸斷仙人碧玉簫翡翠花鈿明月璫新粧獨下
鬱金堂雲茶可比東門女窈窕何如西曲娘鏡面三更祠老
婦馬頭五日望中郎銅盤銀燭裁縫歇紅淚飄成珠鳳皇畫

作闌干織作屏迴風團扇合歡鈴蓬山隔水初無路張姓連
天舊有星門草東園憎蛺蝶裁衣西閣感蜻蛉逢人莫把元
芝采重恐陳王賦洛靈聞道深居慣織縑琉璃硯匣罷香奩
金蓮七寶秋鳴杵銀蒜雙鉤暮卷簾檻外明河千里白天邊
新月兩頭纖蘿蕪楊柳今遲莫誰唱清歌昔昔鹽其他佳句
如新故漫持縑比素別離應似漆投膠娉婷後夜憐歡子消
息今年怪阿婆納素三條新約帶屏風八尺舊藏鎗曲水芳
華多翠蓋雕梁棲燕盡紅襟愆期未必來橋下偷嫁多應到
汝南淫思古意遠接齊梁惜麗京先生望遠曲散失僅存十
一也

馮君號雲伯與余相見於馬小眉觀察文藪山房傾衿寫抱
流連竟日夕因出其石經閣詩鈔讀之清而能腴淺而能旨

洵梅里近日詩人之最也觀水云清谿曲曲抱江亭新漲初
添漸沒汀蓮葉涼支秋雨綠萍花影倒遠山青爲漁先具借
舡帖買犢因繙種水經且把一竿隨意釣趁風飛上小蜻蛉
天香菴探梅卽李徵士秋錦先生祠有宋梅十三株詩云瘦
骨全身護短籬南朝舊夢月明知韓家驢子林家鶴臙水殘
山見一枝春風髣髴羅浮邨香草難尋處士門寂莫年年一
杯酒半澆花骨半詩魂其他佳句極多春盡夜云柳縣才郎
翻餘冷梅子初生已解酸新草云暮雨遲澆寒食酒冷煙剛
送曉行人新柳云曉風兩岸人初別澹月一樓鶯早知孤山
云林歸野雀微聞語山有梅花不算孤高邨云岸當城郭斷
千尺地闊蛟龍爭一宮偶作云客裏聞雞常早起窗前見月
忽思家五言如蘆短葉微脫江空沙自明鶯曉無定樹犬吠

不知邨古鏡云不改古時月曾闕絕代人

李畹字梅卿馮君室人也有隨月樓詩詞賦才清綺而降年
夙隕馮君有悼亡詞極工已錄十二卷中梅卿春寒絕句云
夕陽畫閣曬鴛衣了鳥初開待燕飛一樣養花天氣好川紅
何瘦海紅肥風致獨絕又寒夜南柯子詞云細點瓜齏譜間
栽萱草花三年爲婦慣貧家且喜蘆簾紙閣手同叉獸火溫
簫局蛾鐙罷紡車戲他小女綰雙鴉嬾放鴛針今夜較寒些
靜好之意宛然如見宜雲伯之一往情深也

雲伯又鈔錄其同里詩人鍾月橋鼎周桐北鳴盛張堯民昌
衢及嘉興馮春泉光熙之詩見示屬爲識別以存其姓名月
橋久客維揚與錢唐張堯峯如皋管齋目諸君爲文字之游
窮老無子詩多散軼零章斷句僅而在人口者詠鷗云夢裏

五湖白沙邊片影明七言如遠樹煙蒙山頂寺畫船影亂水
邊鐙桐北五言如石出分樵逕山空有斷雲漁庵孤艇小沙
戶晚簷添皆可誦堯民長於考證有禮記地理考經義咫聞
等著以丙子舉鄉試榜後一月而卒年未四十爲可惜也有
半渠新水魚爲媵一夕輕雷竹有孫之句爲人所稱然謁劉
龍洲墓訪顧亭林故居二律尤工謁劉墓云古隴榛蕪斷碣
眠激昂尚想度江年汀洲孤棹鳴蘆葉屈雨悲歌斫髭肩北
闕徒教畱諫草東齋無復薦寒泉當時氣轍辛陳輩肯惜千
緡買酒錢訪顧故居云直令風從百世聞眼前青紫等浮雲
范滂岸獄辭賢母左徹弓衣哭故君書到公卿徵舊史字搜
金石富奇文荒祠遺像清高在一掬寒泉薦夕曛春泉曾客
邗上題襟館然與余未及識也登維揚城云雲垂低樹含江

白天映長淮到海青慈湖道上云山家有路雲常隔水碓無人夜自春燕子磯云山擁曲屏常櫓入帆移斜照隔江來五言如鳩唳平岸水湖漲一江煙人吟山半寺雨滴竹閒樓殊得唐賢風格諸君或羈窮憔悴或早天天年不獨名字翳如一二殘篇鬻翰幾幾乎不飽白魚蒼鼠是可慨已

魏唐朱君香樣名兆封一名泳名諸生也先是鄉會試未有詩君獨刻意爲之人笑其迂及後改表爲詩人始從事於韻語轉就之問業焉君詩雅潔有格律而不損其性眞陸魯望祠云老木寒煙沒蘇碑一椽寂莫祀天隨春秋大義平生業杞菊風流高士詩夜雨松陵迷遁跡秋山甫里妥叢祠天涯何處尋漁具立馬荒江薦芷籬九日登高懷人云四野蒼茫天地寬城樓憶昔此陪歡可憐寂莫重陽節依舊漂零側注

冠海畔風霜衣袂薄天涯兄弟酒杯寒年年孤負萸囊約一
片雲山兩地看垂虹晚泊云橋外依依柳臨風一繫舡疏林
明野火孤鳥沒江天流水蘆中渡垂虹月上弦太湖看未遠
回首隔雲煙餘如白雲菴感舊云四面青山雙戶扃滿林黃
葉一僧歸齋居云家有健親真是瑞門無雜客自然清五十
自壽云六州鐵鑄前途錯千佛經名後輩多芝朮偏宜窮漢
體雪霜爭集腐儒冠又一絕云園丁自注市賈自注共樽匏
昔夢憑君認孟郊附翼攀鱗名士態平生不棄布衣交其志
操蓋可見矣君有柳金閣初稟種菜居集藏於家

魏禹平水邨圖多見於前輩集中曝書亭所題乃禹鴻臚所
作者今觀倚晴閣詩鈔有贈梅雪坪兼索畫水邨第三圖詩
畧云余家白鶴湖畔住畊把一犁釣一竿水邨之中無長物

放眼但覺漚波寬第三圖乞君貌出縛茅結屋笆籬攢疏梅
幾樹繞宅後隙地間以青琅玕又有送徐虹亭南還詩曾訪
鷗波叟爲余畫水邨平田青接斥疏柳綠當門然則水邨不
止一再圖而已惜煙雲變滅不可得而見之矣水邨詩志和
音雅惜惜琴德七絕尤寄託微婉飲嘉樹軒自注爲衡藩故宅云翠
鈿遺處杳難搜望裏荒煙接暮愁畱得故宮螺黛影春山如
髻滿城頭題羅帶譜詞云鄉緒茫茫鬢漸絲不堪重唱翠羅
詞桃花影裏江南恨正在湔紅簇蜨時秦淮雜詠云簾額風
高翠幄開紛紛燕子競飛回銜來長樂宮前土盡是昆明劫
後灰東惠研谿云升沈相對倒寒尊閒把窮交子細論舊日
娉婷都嫁盡獨畱季女守空邨其寓意如此

魏冬木正鎧其弟石如正錡爲忠節五世孫清貧自守以諸

生窮老而皆能詩冬木詩已見前石如清峭孤冷亦如乃兄
詩亦畧同嘗館於余戚倪氏僅一識面未款曲也今其從子
半石孝廉以清涼菴藁見示乃得盡讀之七古有閩安敦菴
弔關光祿及木蘭祠詩有感伯高祖孝烈先生事一首沈鬱
蒼涼述序忠孝最爲合作宣城張中丞廟一律云淮南江北
望睢陽千里風煙接恨長但使孤城能拒敵已令諸將得扶
唐空山遺貌須髯怒吏部文章日月光異代不須橫夜笛舉
看天地色蒼涼胥塘曲云十里胥塘開翠奩南風吹柁浪花
粘回頭欲認新橋柳已失城東古塔尖清涼菴雜詠云梁甫
吟成雪滿鬚蓬廬忽自笑頑軀百分之一隆中相牆下黃桑
四五株風致可想石如嘗館一富室久不歸家家人以米罄
作書告急石如閱後卽卷置筆筒中更數日其弟子見之驚

問此急事先生何不言卽呼人送諸其家石如乾笑而已冬
木娶婦有奩田十餘畝後婦家貧冬木以券還之妻孥饑啼
勿卹也兩人之高潔如此

魏半石孝廉行湔奇肱之士嘗慕魯連朱家爲人視人之急
如在己輕錢刀出死力以濟之見齷齪章句之儒涕唾不屑
故遊道日廣而嫉者亦衆詩非其注意而時有傑氣觀察鹿
公重建先忠節公祠志謝云冰壺朗照浙西東崇禮荒祠誼
更隆孔李關情憐後裔固喬同難弔先公穹碑半毀封霜雪
綽楔重新勸孝忠奕世旌幃何以報敢忘砥礪守家風鹿公
之高誼孝廉之感奮皆可傳也餘如煙雨樓云釣鼇磯畔雁
初過露冷夫渠奈老何日暮秋風起四野疏砧偏是月明多
種菜云鵲頭鉏小手親攜旨蓄辛勤仗老妻從此閉門長把

卷消磨三百籥黃齋風趣殊妙孝廉之兄翠園名行潤篤行嗜學爲鄉里諸生祭酒其瓶山懷古云南來匹馬渡江流王業偏安且一州此地有山埋土缶中原無路返金甌泠泠清磬仙宮靜颯颯驚焱古木秋細讀殘碑思往事滿堦蟋蟀使人愁五言如秋柳云笳悲青塞月馬老玉關秋菱花云明星臨野渡殘雪點寒流皆有唐人風調

柯曠園復銓銀臺岸初之元孫早棄舉業以吟詠爲事同人多推讓之沒後子姓衰替其遺稿散佚無存半石爲搜得三數首錄以見眎爲登二首以慰秋墳之唱云爾煮茶亭云新綠長堤外斜陽小檻西棋聲聞隔院塔影落前谿水憶中冷調茗曾雙井攜還疑解眼沸松吹響清淒會景亭云舟楫吳中盛都於此地經春波通用里芳草抱孤亭暑到蓮溪淨風

來漁潏脰尚書遺迹在白鷺下前汀

乾隆癸卯余年十七館于胥塘倪斐君筠家時江菴亦同教授倪君南鄰有王修竹明經名志熙以行草擅名兼工繪事尤精於鑒別一時收藏之家必就質焉余數與相見亦時過其家老屋數椽僅支風雨而帖石種竹雅有逸致几案研瓶亦各整潔別後不相聞今下世已二十餘年矣斐君早年夭逝江菴以療卒回念當時聚首殆如隔世修竹有論畫一百首今摘錄三首餘可例推鶴髮童顏老謫仙坐收神妙到毫顛祇應暖翠浮嵐裏供養煙雲九十年清閨尊彝嗜絕奇暮年漂泊劇堪思菰蒲漁艇龍涎細不蹋王門作畫師蟹舍漁莊遠近間人家多在水雲灣斜陽一抹濃如黛可是江南雨後山又采吳諺爲十二月竹枝詞其二月云竹槍籬傍矮牆

腰不共鄰娃野菜挑
鎰下忽裁綰五色報
郎明日是花朝
四月新晴正
麥秋叢祠佛閣暫清游
蹉跎莫近黃梅節
風又烏頭雨白頭

與修竹同時稱詩者有徐秋浦
紹勛沈蘿邨堪顧秋坪祖仁
秋浦詠蘆花云無香亦無色
非蕊又非花隨月明秋水因風
覆淺沙蒼茫行客路冷澹野人家
去去尋鷗夢孤篷一葉斜
他如幽居云知已一輪月
鄰居四面山雲林迷鳥道士壁間
蜂衙種菊云四壁苦吟憐蟋蟀
一鎰孤影讀離騷鴛湖送春
云紅薇徑側鋪吟席白苧橋邊繫酒缸
田園雜興云邨社雞豚爭揖讓
藥蘭草木辨君臣豆麥有收多兌酒
陰晴無定亂穿衣風趣在石湖
釵南之間蘿邨曝書亭云坵分南北
繼唐賢猶有臨江屋數椽
大布衣承金馬詔小長蘆隱玉堂仙早

從朔漠搜奇蹟老去園亭理舊編絕似鄭家通德里一庭書
帶草芊芊五言如野艇東西渡江邨三兩家哭鸞如云半生
唯此女一命付庸醫哭妹云憶妹詩傳同谷少寄兄書到大
雷無南泓云一葉舟穿波上下半彎月出樹東南卽事云溪
漲拔蒲齊帖水日斜鵝鴨自歸家皆可誦秋坪曾問業於椒
園先生故詩有矩矱椒園有美女簪花仙人嘯樹之目五言
如柴門云雙扉扃夕陽剝啄聲不至不是喜常關出門無箇
事其高致可見又過鴛鴦湖一絕云滿湖明月夜如何無數
行舡起櫂歌兩岸人家簾幙靜不知春夢屬誰多

唐應焜字新周號棠谿嘉善人以明經遊太學爲武進劉文
定所知文譽日起兩中副車教習滿當得教諭以丁憂歸遂
不出開門教徒以終所著有棠谿詩文集詩經劄說入府邑

志文苑傳其詩溫厚和雅稱其爲人冬日邨居云露積依枯
樹柴門對稻畦圍爐煨半芋倒甕擘團臍情已安枝鹿時還
學祝雞誰能尸畏壘渾欲結幽棲懷沈蘭修云與君殊契闊
何處最相思翦燭愁孤影開函檢舊詩山邨殘雪夜屋角試
梅時已近春消息先應寄一枝和人寒夜有感云風緊窗虛
透月光冷寒面目露僊荒鐙前課讀謀生拙被底推敲覓句
忙膚末幾會窺八病老成自合擅三長劇憐歲暮猶雌伏夜
半悲歌動拍張送王赤霞遊秦云先公宦績著長安知爾摩
碑不忍看尚有與人歌頌在空爲廉吏子孫難故交應念西
華葛他日曾彈貢禹冠畱待歸來行色壯五花寶馬蹙金鞍
其他佳句甚夥和人自壽云薛氏多材誇似鳳王郎小字愛
呼僧文場共剪三條燭村社剛分一稜田和畱別云坐來絳

帳容多士歸與青山作主人懷董帷園云苦緣別緒紛難數
翻謂能詩不在多規友云滑稽自喜同齊贅逋峭殊難借魏
收贈人云老困功名庸俗棄貧能頤養子孫賢送人移居云
晨夕南邨宜聽雨風煙東瀼易悲秋題畫云似曾相識谿邊
路第一難忘洞口花皆能出以爐錘不爲苟作

獨遊出家雁塔寺其本師北萊上人名廣信亦詩人也於是
香鐙佛火時復披吟茶版粥魚閒多酬和師弟之間自爲知
己亦美譚也北萊詩氣無蔬筍語帶煙霞鴛鴦湖云閒倚蘭
橈作快遊楊花如雪點波流鳴頭水漲粼粼碧不見鴛鴦見
白漚波紋如縠盪輕舟煙雨空濛一望收花鳴柳塘隨處好
不須倚棹上層樓金閭雜詠云夢醒篷牕月落時鐙光漁火
望迷離三更已過四更破何事寒山鐘打遲鐵花岩古字模

糊石坐千人我獨孤爲向生公稽首問青山一角肯分無
胥塘顧竹广功枚詩才清絕雅潔自好與獨遊交最密嘗以
晚春卽事詩見咏云杜門頗憶春郊樂此願何難竟未償手
把一編閒處坐落花何急燕何忙穀雨今番雨最多書齋十
日斷人過消愁賴有紅襟燕銜取殘花補舊窠落紅成陣萬
花殘芍藥遲開尚儼看一事心頭卻惆悵送春容易送人難
自注時獨遊將歸蓋先廡寺中未披雍時也獨遊法名天寥
海蜚字今皆作蜚宋俞玉吾有海牒詩云生以蝦爲目來從
水母宮則又作牒字矣

樓大防荅杜仲高書云杜詩所謂黃知橘柚來極爲佳句然
誤矣曾親到蒼溪縣順流而下兩岸黃色照耀真如橘柚其
實乃花棹也花棹不知何果然此亦不足辨也

玫瑰雪巢詩序云詩之衆體惟大篇爲難非積學不可爲而
又非積學所能到眞名論也今之洋洋數千百言如河漢而
無極而案之其中枵然或餽釘故實厯雜論議以爲奇者皆
未可與知此事也

靈芬館詩話續卷二

吳江 邵鑾 祥伯

杜樊川天下才也才氣豪邁不拘細行於是江湖落拓之詩
青樓薄倖之句流傳人口而狹斜放誕之事悉舉以附益之
湖州之請以弟顓目病乞於南中獲遂醫藥養生之資其上
時相書具在可覆案也乃又以水嬉之事尋春之詠巧爲傳
合亦可云厚誣賢者矣宋田承君畫詩云弟病兄孤失所依
當時書語最堪悲豈圖乞得南州後卻恨尋芳去較遲論事
可云得之矣而猶惑於流俗小說之言余有一詩云男兒恩
怨那能灰太息樊川未易才三乞湖州緣病弟又教人道水
嬉來少爲一雪此謗也

分湖葉條生樹校有改吟齋詩四卷余曾爲之序條生家極

貧以筆墨餬口四方妻子不免飢寒所見詩人之窮殆無過
此君者然性耽吟詠又好交遊時有賓朋過之典衣沽酒意
灑如也其佳句如二赤自都門歸云都驚湖海豪非昔始信
長安居大難事當失意惟孤注人到回頭亦苦心秋草云此
日何嫌如土棄他生莫更出山遲乞花云贏得山妻開口笑
眞如買妾到家時卽事畱贈云生涯各有勞薪歎詩卷眞成
束筭看皆自寫胸臆清寥可誦也題吳雲璈分湖秋泛圖云
秋光都在水之湄着箇瓜皮艇子宜卻笑新城老司寇一生
得意冶春詞寫秋先要寫風蘆疑有涼煙水面鋪不道漚波
亭長後居然又見水邨圖林梢一抹夕陽頽獨自湖心盪漿
回只有白漚閑似兩蓼花紅處等秋來神味俱佳又題陳子
玉鄧尉尋春圖云修到梅花亦大難尋春那不小盤桓前生

同向梅花證爾得清臞我得寒則自寫生平可爲悽惻者矣
分湖葉氏明季最盛午夢堂集一時豔若神仙橫山以後作
者寥寥條生又貧苦不振然猶不失家風也

吳雲璈鳴鈞與余同里余移居魏唐時雲璈甫成童耳五六
年來始得相識嘗數過靈芬館余出門亦必過其家飲酒談
藝溫溫虛虛執後進之禮甚恭初學韻語出筆便爾不俗和
丹叔同天寥上人過訪原韻云手折梅花只自簪夜寒誰共
此孤鐙如君真是歸家鶴笑我翻同退院僧話別各驚顏貌
改傾榻不覺月華升只嫌蛇尾流光速柔櫓旋衝隔浦冰寄
天寥疊前韻云靜拈筠管小於簪擘紙重挑午夜鐙意外忽
來湖海客座中初識水雲僧

自注余與天寥神交已久今才識面論心祇許琴

三疊持戒猶能酒半升欲寄新詩吟未就霜風吹凍硯池冰

吐屬雅令婉有深情從此研精績學所至殆未可量吾鄉後來之秀於此君有厚望焉

子未以 國初詩人李應機圃隱詩文集十六卷見示曰此吾邑宿儒嘗受業當湖陸清獻之門而與水邨東齋諸人倡和者余受而讀之大抵文勝於詩在魏叔子汪遜翁之間出入矩矱而不爲空言詩則溫雅樸茂無囂凌之習亦無警策之處奇逸不如東齋而無其率意積放之作名雋不及水邨而無其酬應恬熟之病要之抗心希古不碌碌者也五七古託意極高而遣詞未當一篇之中瑕瑜不掩一卷之內蕭蘭互見近體專主風格亦流露性真東齋序其詩以爲從唐入宋如從教入禪擬議之極變化漸成賞音之士以爲陶鑄兩代卽唐卽宋雖稱許太過未爲無見而云然也掩關云六月

謝人事煙雲護薜蘿紛紜萬慮絕貧病一身多耐可鈔書卷
無端獨寤歌豈能遂閒適漫此託岩阿入世無一可相看總
不歡祇因當境拙以此出塵難空有宜無相將心沒處安何
如釋羈馭風露任盤桓自題布帆無恙挂秋風小照云酒殘
詩倚一椀肱秋帆間挂夕陽天屈原有意歌河伯陶岷無心
號水仙未識剡谿勞寤寐但隨清渚可流連昔人行樂嗟遲
暮趁好風時且放舡歲暮書懷用石湖韻云苑枯畢竟盡由
天以此冥心息萬緣鶴氅製成辭白袷羊裘著破剝青氈風
簷圍被蒙頭臥霜重煨鑪放腳眠世路波濤隨處是不徒嬾
上釣魚舡糞火堆中老芋煨暫教飽暖卽春臺喜逢高屐破
苔至怪道明鐙帶葢開陽氣已經來七日寒光終是護三台
南山蕪穢當吾地豆隴還須着意栽餘句如損膳買書聊樂

耳得錢沽酒且中之桃李春風畱別恨松楸寒木有餘哀未
諳世故猶沽直不合時宜尚論文往事頻煩三日惡此生何
異百梟投秋蘭幾級湘纍佩杜若誰憑下女貽七絕懷舊雜
詠百四十三首中如懷陸稼書云脈絡宗傳紹考亭烏臺聲
望凜風霆青壇曾坐荒齋裏急雪寒鐙授一經冒巢民云水
繪堂連寒碧樓蛾俠侍擅風流雄豪公子聲華甚老大傷
心故國秋黃鷗鵠云樸魯無文道貌充編詩注易有深衷布
袍誰識遺民在只認當時藥肆翁周青士云聲華籍甚重公
卿處士長歌滿洛城客死可憐徒四壁悔教寒卻北山盟其
游道之廣師資之益蓋可見矣又一絕云緼袍狐貉何關我
蝨簡蟲編可度年傳與子孫寧餓死莫將班史質金錢尤想
其清操雅尚也

圃隱又喜爲詞水邨序之曰晨霞子近詞含豪淒婉觸緒蕭涼象外冥搜得縹緲迷離之意其鐙夕甘州調一闕云又東風吹到故園來裂破一池冰恰新正半月微烘晴日猶自淒清何處酒旗戲鼓高架結鐙屏懽笑同攜手羅襪輕盈不怨愁羈病侶只怨鬢絲無賴抽出青青伴橫斜瘦影辛苦締深盟羨當年勝遊佳節恨當年花柳少逢迎到今日茶鐙藥臼閒費調停圃隱字密齋家有圃趣園故以圃隱爲號父煒字赤茂有圃趣偶存稿兄光堯亦清獻弟子與梅邨祭酒倡和并注其集今皆不可見矣

魏唐當明季時園亭之盛甲於禾中錢氏一家凡有二三十所羣從間以此爭奇角勝今則臺傾池塞或化爲墟莽禾黍之場不復可考尋矣去魏邑數里有楊君青溪名塋者家豐

於資因卽其所居之隙地闢爲小園名曰涉趣疏花植援帖石引泉皆躬自布置累數年乃成又多徵名流題詠於是涉趣園之名時在人口君復裒輯成帙從人乞余爲序將付之梓未及而卒然其風雅好事今之杼杼富人蓋亦鮮矣君有涉趣園落成詩云小築辛勤閱歲頻落成眞是一家春敢云邱壑蟠胸有且喜亭臺入眼新曲水平橋紆地脈孫桐祖竹卽天偷野人只戀田園樂營得菟裘寄此身又有涉趣十景五絕皆清灑可喜子姪及閨中人亦皆有題詠其雪夜一絕云陣陣松窗雪打聲消寒贏得酒頻傾何人準泛溪頭艇已辦山厨玉糝羹風致殊佳

余於去歲始識錢君默菴肫然君子人也食貧守道以課徒自給非其應得一介不苟垂老無子故詩中時及之見人寄

家書云一封手寫報平安令子開函應共懽我亦有書無可
寄不如君處最心酸哭朗齋姪云壯志銷沈終未申況如伯
道更含辛無兒一樣君休恨猶勝衰年後死人豈歸蓬島侍
羣真小謫塵寰只卅春今日悲吟我哭汝他年哭我更何人
悽咽之音不堪卒讀然亦有和平恬適之作如慰竹齋云病
不傷生寧慮死貧能行樂卽爲仙和人云何用虛名招世忌
但無妄想覺心寬生計不須田二頃安居只少屋三間秋夜
云月印魚梁浮水鏡露粘蛛網絡銀絲又東竹齋患瘧云眞
率元無冰炭腸況知世上有炎涼聊憑店鬼據掄意此意教
君畧一嘗君名增胥塘人朗齋名元炳亦名諸生劬書自厲
遂咯血不起其送人云鶯花春夢裏風雨夜燈前出語幽怨
足徵其不克永年也卽事二絕云一番雨過快新晴梅子初

肥科斗生啼煞黃鸝誇未老綠楊枝外兩三聲南陌東阡取
次行田家叱犢盡催耕蕭閑只有紅襟燕要門雙雙掠水輕
魏東齋少野集中亟稱其姪儒熊儒魚之詩儒熊詩未及見
儒魚詩附存數首亦皆效臣叔之體東齋詩云孝莊之子庶
常孫泉有源頭芝有根正氣當時扶世界流風此日護家門
孔文舉旣冰稜化禰正平偏規檢存吾譽兒曹非是癖請看
人與玉俱溫其稱許如此儒魚有息踵居夜集和馮又三用
東坡韻云林壑追陪興未窮飲酣絕似澗邊虹當年高會扁
舟月此夜清譚滿座風傳訊久看兩地隔論心先見六人同
爲期不遠重相聚短簿祠開落日紅題施翼聖東荒田舍圖
云好手偏能着意摹隱居又見畫成圖琴於閑市曾酬價研
似閒田不取租海內無朋渾是冷山中有伴正非孤請看滿

院長松外添出青青幾萬夫雲吟月嘯儘徘徊未與人間斷
往來繞屋惟看深柳合過橋便有雜花開隱書攤處長爲主
鈍榜懸時暫作魁續聚桂如容入會尚當尋爾向溪隈儒魚
號立泉工書法

今年三月種水曹君言純過訪靈芬館出手定徵賢堂詩十
六卷其中數年之詩皆余所過目者間有可否種水頗不鄙
夷其言一一釐改新作雜詩三十餘首仿陳拾遺張曲江之
意而不襲其貌琅琅乎純古澹泊大雅之音也又以其友人
蔣君華隱浩暝琴館詩二冊見示其風格體裁與種水可謂
如驂之靳五言古律尤爲精詣舟次漱上云山氣逼清曉樹
聲驚夜潮夢魂寒枕尾春雨灑松苗拄杖來看客野風吹度
橋幸多素心侶幽處狎漁樵宋研云石硯寒雲色潭凹夜凍

呵松絲窗際落梅氣水邊多詩已呼兒祭人猶被墨磨空懷
壯夫恥焚棄欲如何他如渴虹懸石壁白鳥破谿陰瘦竹穿
欹壁蠻瓜絡壤籬皆力去甜熟自標清雋體雖四靈不碍爲
大方也

王君東園之兄杏園名輝祖有養拙軒詩藁雖篇什不多而
時有雋語其和修竹十二月竹枝詞云菜花落後豆花香幾
稜纔分未下秧不雨不晴雲卵色者番天氣爲蠶孃筆策籬
頭似塞蘆好尋梢桡暖園爐西風不著彌陀面休慮明年米
似珠自注十一月十七日俗謂彌陀生日諺云吹我背米不
貴吹我面米不賤二詩頗有石湖遺響

往歲偕吳子修訪馬小眉洵於梅里尋秋錦之堂訪暴書之
亭詩酒倡酬流連信宿嗣後惟以書尺相聞今年小眉知余

歸里以二律寄懷云書劍漂零卅載餘年來坎軻復何如司
勲應有江湖感孫楚原無鄉里譽客裏光陰催老大詩中羅
綺漸銷除怪余懶散真成癖惟念故人心未疎交誼如君表
裏眞尺書鄭重往來頻梧邀河朔難爭席時蒙見招以詩派
事不克赴江西有替人擁被同眠聽夜雨閉門卻埽送殘春過橋背郭
罵塵外大好分湖寄隱淪其天香庵探梅分韻云春風吹我
來杖藜古祠幽絕同禪棲盤青野蔓絡松鼠傍岸水籬啼竹
雞寒香逆鼻夢未破老幹壓檐肩差齊裴裒終日吟不足薄
暮猶繞谿東西又舟行太湖支港句云人家夾汊綠邊出水
鳥避船煙際啼皆絕似竹垞學涪翁之作君篤於伉儷悼亡
後畫西湖送春圖以寄意故余和其韻一聯云隔歲傳書誰
話雨中年刻意是傷春

槁項黃馘之士名不出里閭縱有名章秀句當時已無人傳
道更歷數十年其不爲蠟車覆瓿之用者鮮矣近又得平川
吳鶴田大椿詩數首其佳句如談禪客到分梅供偕隱人遐
遣鶴招眉彎粉額初三月人住紅橋第四樓泉流石上琴三
疊墨醺花稍露一匙未熟硯田憑字煮已穿詩袖借雲裁皆
得元人風調

澄江殷耐甫塲老詩人也其從子焯然思尹爲嘉善令因來
署中見訪靈芬館自言十載相思始得一晤劇談半日別後
以七言長篇爲贈激昂頓挫有光英朗練之致特推挹過當
耳又舉其客中近作數十篇嘉禾道中云新蒲細柳何紛挐
水邨處處開桃花千金圩上霽新雨七星橋外明曉霞鷗羣
遠從別浦出漁鼓忽向中流撾娟娟淥淨不可唾東風拂浪

春風斜魏塘卽事云柳洲亭外綠含煙桂圃瓶山几案邊一
夜桃花春水漲漁舟直到縣門前文水橋邊杏雨飄慈雲寺
外酒旗招橫塘一帶青青柳不繫春聰繫畫橈小庵深院冢
崔嵬中有詩人仙骨埋畫筆風流今不見亭亭一樹野梅開
五言如何處杏花紅鳩啼一城雨曙煙和野色夜雨變谿聲
皆可入唐賢之室其他長篇不能備錄耐甫又以其亡室沈
夫人綺環碧軒圖屬題圖爲夫人女兒次昇所畫風鬟煙鬢
渲染如生夫人少孤夙慧塾師訓之識字一過輒不忘生時
著作甚夥詩文外兼通星緯夕桀之學年二十六而卒殆所
謂雲華示現者耶其集客中未攜因爲余誦其數章其家居
卽事云前傍青山後水涯尚湖煙景屬農家一簾疏雨斜陽
外人在空庭數落花寄女兒云聞道君家茆屋好開門日夜

對平湖能將一幅溪藤紙澹寫湖光寄我無又云腕底多情
筆底知阿兄工畫我能詩題詩與訂黃花約畫取秋風欲起
時其閨閣中一門風雅如此沈氏自吳江遷居尚湖當是君
庸之後夫人時因展墓并遊洞庭皆有詩紀之惜未見其藁
耐甫贅於尚湖而讀書家塾解館始至壻鄉別離之日爲多
夫人有詩送之云相思幾度得君來才得君來又送歸日暮
離亭簫鼓歇滿天黃葉向人飛湖上秋風吹柳枝黃花開向
送君時送君判醉黃花酒明日花開更對誰嫵婉之好幽怨
之詞真覺入人心腑宜殷君之惓惓不忘也

夫人有侍婢名雲娃絕憐愛之故余題詞有侍兒已合雲爲
字想見玉人如月之句夫人有寄外詩云不寐漏三更風聲
雜雨聲寒從今夜甚病是去年成歎枕思前夢挑燈話別情

阿雲愁似我卻已淚盈盈又一絕云靈虵倒縮鬚雲斜斜插花枝態更加似此粧成休見避殷家知不是桓家調笑之詞具見淑婉之德他如五言云暑隨三伏盡秋入五更知潮到疑吞岸雲飛欲動山秋雨秋風夜思君思我時七言云倚樹每愁花落去登樓又見燕歸來青山半向雲邊出黃鳥多從雨後嘯皆清麗可傳

吾鄉陸朗甫中丞清德重望爲乾隆時名臣所選切問齋文鈔及所著古文皆布帛菽粟鑿然有用之文詩特其偶然存稿止得二卷然和平雅整度越凡流望而知爲有德之言也效樂天體云何處難忘酒鄉關邇暫過菰蘆朋舊健鶯鴨水邨多蠟炬宵同剪驪駒客又歌此時無一磔其柰別愁何何處難忘酒長安大隱尊俸錢支屋價月粟佐晨飧好事攜琴

至諸兒問字喧此時無一礎岑寂對朝昏畱別舅氏云兩月
高軒一榻排征衣久拂又遲回貧來親戚憐同病老去光陰
覺易催池面淥波寒有稜石關春事暖生苔茲行愁絕滄江
暮萬里孤雲倚棹開偶感云知己未妨當代少浮名深恐後
人間扈從木蘭云如卷畫圖雲過眼偶成酬倡谷傳聲網面
時開知有祝周陞旋啗聽無聲和阮吾山云機事漸忘除害
馬心思曾竭似原蠶里中知交落落嘗賦五友詩迨吧望云
衣冠緬諸老圖像懸梓里中吳舊文獻一一寫彼美尤工作
蘭草芬芳襲滿紙迨善畫嘗臨吳中先賢圖一冊沈需尊云
沈郎絕可憐身事如畫餅作詩十年餘閉戶忍饑冷嗜好菖
歎芰交知罔兩景沈工於詩已鈔入銷夏錄中矣迨修君云
我師有令子家食困餬口少小同筆硯交情酒味厚又云當

時握寸管已能運腕肘聲名近卓犖竟欲輕歐柳修君工八
法與峴望皆余母氏諸父行其父倍功先生中丞爲志其墓
余祖父從受業者也沈懋維云賣藥歸養母慈淚制悲滴孝
行我所欽夢繞小橋側沈爲余族祖姑之夫以醫爲養徐滄
如云徐子頗秀蔚文如木向夏槐陰覆廣衢藤蔓走修架徐
居蘆區之西柵門臨湖水殊有幽致與先君子莫逆亦以工
書名至今里人猶寶藏之此五君子余皆幼時接待憫其無
聞錄中丞詩亦以存其人也

梁山舟先生以書名海內者數十年轉以是掩其詩名沒後
始得見其頻羅庵遺集於同輩中能拔戟自成一隊者小詩
尤新簇可喜七夕有作云燭灰蠶死總都休終古銀河愛水
流除是僊郎長不老年年值得爲情愁詠團扇云要畫乘鸞

仙子身風前月下喚真真卷然女手親提挈一笑分明兩玉人
隱囊紗帽成前夢紅裏烏絲記往時便面風流今已矣也
如顚顚謝芳姿饒有風趣殊不類其爲人

洞庭產茶名碧蘿春色香味不減龍井而鮮嫩過之相傳不
用火焙采後以薄紙裹著女郎臂前俟乾取出故雖纖芽細
粒而無焦卷之患山舟學士有謝人惠碧蘿春詩云此茶自
昔知者希精氣不關火焙足蛾眉十五朵摘時一秣酥留蒸
綠玉織袿不惜春雨乾滿碗眞成乳花馥蓋指此也山中所
產之地止一方充貢外雖地方大吏亦不能多得今年樊君
補之託其友人於家園中分餉半斤許眞不啻食西施乳也
海州許月南桂林研窮疇人之學著宣西通三卷大意以西
人之術其原出於周髀宣夜而務爲獨得以宣夜言七政有

高下爲西法之所從出西法因高下以分重數遂創立本輪
次輪均輪之說爲必不可通而卽其法以駁慈頭木節眸子
之說持矛刺盾甚爲明通月南有味無味齋詩十餘卷才氣
奔放不屑蹈籍前人五七古沈着跌宕合者上闕韓蘇亦時
時入於盧仝馬異近體自寫性情出入宋元五言如草色亂
淺水菜花疑夕陽硯煙雲潑墨茶竈火傳薪七言如主人夢
定爲胡蝶圖叟名應是橐駝風前兩樹如交讓雨後孤花尚
獨搖野草精神連夜雨鄉關情緒幾重雲老樹有陰如小屋
晚花無力不重臺鏡裏梅枝香到影瓶中茶韻脆於笙七絕
如西風得雨易颼颼片片涼雲屋上流叢菊試花梧墮葉不
分榮落一般秋清光正照簾垂處佳節剛逢病退時問着去
年偏說好不風不雨不相思灑然清致具見襟情之超曠月

南兄喬林號石華有平輿二龍之目惜余未之見也

嚴四香冠別十餘年今夏相遇於袁江年六十一去歲尚舉一女因言其姬人歐香之明慧津津口角昔徐虹亭云漢陽李雲田口齟齬豁猶道寶釵不寘四香真似之矣四香工於言情善畫墨梅自題云頻年奔走撇西湖蕊冷香疏夢亦孤爲問林家三百樹可曾依舊着花無江城悽楚笛聲聲竟夕高樓倚月明爲寫故園風雪意梅花最管別離情其小游仙詩腐悼亡之感兼爲侍姬而作者飛瓊了髻住瓊樓得侍金仙幾世修笑指盤桃東海熟自家栽種不須偷自從阿母跨青鸞小玉熏爐侍絳筵何事桃花含宿淚爲他笙鶴遠瑤天皆有欲喚奈何之意他五言如愁嫌更漏永病覺雨聲多江山詩滿眼蘆荻雪盈頭七言對雪云煮茗風情堪入畫撥灰

兒女坐依燈高郵道中云處處綠陰唯見柳層層新漲盡生
蘆皆泠然可誦

山陽盧湧號蓉湖詩才清峭學有根柢抱伯牛之疾抑塞
門深可歎息余所見僅二卷雜詩云落日下荒野白雲戀故
山俯首睇層波照見遊子顏亂髮垂過耳塵沈鬚眉閒驅車
日以遠故鄉何時還妻子不足道知否高堂年顧視荷鋤子
十畝方閑閑十年客他鄉間一入城郭平生骨肉親強半赴
冥漠白楊風蕭蕭邱冢相雜錯同作長眠人新故無厚薄有
時經其間欲語誰唯諾我無絲與竹那解數日惡痛飲勿復
陳人生貴行樂讀史雜詠戾園哀云蓬萊仙人呼不起儲君
已到泉鳩里宮中桐木寧有諸父求長生子求死覆轍誠恐
同扶蘇斬說炙巫斯過矣痛絕壺關三老言子盜父兵求免

耳噫嘻乎悲哉格鬥空死賣履翁焚蘇何如族江充茂陵豈
獨輪臺悔腸斷湖城思子宮五代史云百職紛紛勸進牋中
朝宰相最居前當時只有朱全昱記得唐家三百年小詩如
澄江舟行云繫纜競候潮如雲集賈舫暮雨唱吳娘知是江
南客夜歸云但見湖上煙不見煙中樹何處古浮圖一鈴獨
自語又如曉星纔墮地殘夢未離家一磯酒澆黃歇浦半天
雪湧伍胥潮有才如此而厄之以疾造物者果不愛才耶
武林李白樓方湛余舊友也生平跌宕自喜而羈遲流落卒
以客死其詩刻入同岑集中其弟桐邨方治幼棄舉業惟好
爲詩五七字近體甚工西溪溪上巢云一庵深翠裏竹逕晚
來幽嵐氣逼鐙小溪聲繞枕流夜涼疑作雨山靜自如秋頗
愛依禪悅蕭然雲鶴儔帆影云五兩輕風百尺檣斷雲一片

過瀟湘平生遊跡隨流水無限愁心挂夕陽折柳渡頭波渺
渺懷人江上路茫茫倚樓有客添惆悵不奈離情望裏長同
徐西澗吳山遠眺云江光如拭淨無煙放眼人來雨後天一
鳥穿雲空際沒片颿如葉望中懸斜陽半露峯峯皺新綠初
齊樹樹圓更向酒樓同買醉此時攜得杖頭錢他如嬾雲難
作雨臥柳自成橋愁多催老易貧不累人難客無可戀歸應
早貧固何妨別最難客懷涼喜今宵雨鐙焰高知來日晴皆
有江湖諸賢風味亡友汪選樓家禧嘗爲作序

雜符及蒲詩人以爲嘉肴然蒲菜惟淮南北人嗜之吾鄉固
無有也明顧達存道有病中鄉思詩云一筍脆思蒲菜嫩滿
盤鮮憶鯉魚香顧山陽人號貫初子

吾友徐稼庭實善往在金陵眷一妹號藕香纏絲甚至有嫁

娶之約中間多故幾不克踐今卒歸於徐徐有種藕成蓮圖
余曾題邁陂塘一闕於上先時稼庭屬人畫藕香小影自紀

七律四首錄其二云青谿曲似浣紗谿谿上佳人今姓西弱

腕愛書唐韻小

姬姓吳

長眉慣畫黛痕淒眼波溜處歌珠轉酒

暈潮邊扇月低誰把水精雕作枕梨雲夢好不教迷見時惘
惘別思惘惘悵悵樓西昨夜風魚素寫心詞隱約藕香押尾印
玲瓏曾聞樂府歌憐子似許詩人賦惱公珍重下弦簾外月
一分瘦減一分空藕香和云一鉤屈玉映前溪君住東頭妾
住西燕睡綠陰春寂寂蝶翻紅雨影淒淒十鴛圖畫臨窗嬾
百子流蘇壓帳低只隔垂楊千萬縷煙痕籠月望離迷又云
羞向牆東輕解佩漫勞城北欲通辭湘湄和云卮字闌干紅
曲曲水紋窗網碧淒淒謫仙詩贈金陵子一妹心儀李衛公

曼生和云似籠芍藥煙中影欲覓蘼蕪夢後魂生長華鬢原
跌宕隔重香霧更玲瓏餘人題者甚多

稼庭子婦朱紋字湘炬午山別駕之妹華峰琮之配也工詩
善畫有林下之風寄兄云芳草池塘春檢點垂楊簾幙月溫
存一栢苦茗將愁遣寫就新詩寄白門午日寄華峰云榴花
紅綻晚煙開愁見瑤堦長綠苔離緒不堪人易嬾輕陰連日
近黃梅病中云梧桐疏影在簾櫳失約尋秋病怯風羨殺閨
中諸女伴蒼苔多分印弓弓皆可誦又句云溪水夾花連日
漲亂雲帶雨入樓多

靈芬館詩話續卷三

吳江 邵鑒 祥伯

余遊淮陰先後數年頗思訪求文獻而未得要領近以語蕭梅江梅生舅弟梅生廼以吳山夫先生玉搢所輯山陽耆舊詩見示自枚叔而下至國朝凡一百二十一人漢魏各一人唐三人宋四人元二人明一百四人國朝六人自邱象升而下至邱兢凡四十人爲後人吳揖堂進續錄山甫先生族人也其書搜采精博又以他書所載郡邑志同時人詩文與見聞所逮可以資知人論世之故及可備考証者附著於詩之後其用心亦云勤矣書成未付刊刻傳鈔亦甚尠余旣得閱一過輒撮其中清詞麗句入此編中有可廣異聞者亦並著之非如作此書者以人存詩之意固不嫌簡畧耳具錄

如左

山夫言吾鄉在宋季兵燹最慘舊家世族幾無孑遺迄今宋人之有後於淮者則節孝先生一家元人之傳者惟古逸潘先生之後爲盛至今爲郡甲族云云是集錄潘氏一門詩最多明潘蕃有劉伶臺詩山夫注其後云按伯倫沛國人名列竹林與嵇阮遊其地當在河內山陽晉之河內卽今河南懷慶府考其蹤跡蓋未嘗渡河涉淮遠至東楚也晉後此地亦名山陽意好事者遂由此而傳會之唐許渾淮陰阻風詩己有劉伶臺下稻花晚之句則其來已久矣又潘苞有穆生遺館詩山夫云穆生爲楚元王所禮郡城有楚元王廟治京北有地名交陵土人呼爲高陵傳以爲元王葬處又據諺云射陽九里一千墩不知誰是楚王墳按漢高祖六年封劉交爲

楚王都彭城是時淮陰不在所封境內不知廟與墓何以皆在淮交旣不得封淮又安得有禮賢之館哉所辨駁皆極精覈

吳汝忠名承恩有射陽先生存稿續稿詩筆清而不薄澹而能雋對酒云客心似空山閒愁象雲集前雲乍飛去後已連翩入齋居云窗午花氣揚林陰鳥聲樂冬日送人云馬蹄鳴凍雪鴉腹射殘陽任長興尉作云祇用文章供一笑不知山水是何曹秋興云河漢白榆秋歷歷江湖元鳥晚飛飛數聯皆能脫去塵滓翛然自遠山夫云淮賢文目載西遊記爲先生所著觀其中方言俚語皆吾郡委巷中所習聞而他方有不盡然者其出淮人手無疑愚按閱微草堂小說載扶乩以西遊記問邱眞人事則其非長春所作又無疑矣

王鳴鶴字羽卿以武進士起家爲南京右府都督僉事其秋
夜吟云風聲來樹杪病葉堦前繞明月鑒薄帷涼露滴叢篠
孤城起暮笳隔屋驚棲鳥悲哉千里身悵望關河渺寄和宇
叔云一夜西風急那堪別思懸故山頻入夢黃葉又經年久
斷雲邊雁全荒谷口田壯遊機已息不復慕燕然山夫以爲
氣韻純清無劍拔弩張之狀信矣羽卿屢立戰功著有登壇
必究一書

閻再彭走別張文寺杜子皇蒼畧因登鷄鳴山詩云雪裏人
歸急踟躕別友生衝風尋釣港匹馬向臺城廟闕非前代山
川歎遠征太平堤柳在蕭颯不勝情聞一蒲庵水漲句云草
堂從此嗟搖落蘭若何堪再陸沈滄桑之感溢于言表再彭
爲龍門叅議之子潛邱徵君之父一蒲庵其遜世行吟之所

也

張應錫字兼庵亦以武科起家有六友堂詩集山夫稱其自序記學詩原委專肆力於少陵此外不視也又稱鼎革後不緇不素時懷故國黍離之思此編選至六十餘首讀之信然福建遇故人云天末還王土勤勞敢惜身殊方愁斷雁亂世喜逢人客夢無端異鄉情別樣新遙聞星射蜀俛仰轉酸辛春日構屋云茅齋久不葺相習數年間風雨畱佳客妻孥失好顏著書存已見借地作深山莫道同虞仲殷民自古頑他如仙霞嶺看霧云家國千山外乾坤一氣中安東春懷云寒冰饑鳥啄春樹野雲過秋莊云水鳥朝呼雨農人夜看星過涿州云附枝殘雪風吹落帖地寒烏馬逐飛元日舟中云炎荒捧檄誰將母亂世酬恩不爲官過揚州云骷髏陌上春無

草兵鐵沙中夜有光答人詩云君臣義斷生猶死骨肉人無
客是家詠四皓云逃入商山遠避秦蒼松野鹿樂天真何爲
卻墮張良術一出商山便漢人讀之可以悲其志矣

萬年少壽祺有盛名詳見周櫟園印人傳詩亦散見諸家選
本中清麗可喜如市橋春店馬官驛晚檣烏芳草舟車路桃
花秦漢人七言如草堂舊梅一枝放花云亂後故人猶見汝
定中居士未忘情隰西草堂雜詩云升沈日月此茅屋俯仰
乾坤今布衣梁公狄過訪云斜月啼烏人罷酒早霜驅雁客
登臺置之劉隨州集中當亦未易辨新茶坡應昇有哭萬詩
極工未得憑棺哭相聞亦自憐室啼蓬首妾囊檢鸞書錢北
上曾三別南邨乞一屢喜君存此意松菊晚能全

纔入沅陵道煙波又渺茫曉雲含樹色初日澹山光鷗鷺中

流穩薔薇夾岸香與來堪擊楫隨意賦滄浪此李鎧高都驛
卽事詩也鎧號惺庵登鴻博科官至閤學又有句云路歧憐
薄宦山險累慈親

邱象升曙戒與弟象隨齊名時號二邱以事謫瓊州通判有
送別黃蘭巖云蒿酒新沽蟹正肥邱三何日不思歸可堪悵
望河橋外無數風帆曉夜飛象隨號西軒舉己未鴻博有贈
程穆倩詩云病後相逢邗水涯歲寒雪壓客廬斜縱然澹盡
人間事又寫青山過酒家二詩風調眞魯衛也曙戒令嗣迴
字邇來詩尤工九日云每於節序驚心易縱是鄉園聚首難
小室云已將世事同飄瓦豈向浮生計立錐題獨立圖云局
外置身雙白眼靜中與我一青山

馬駿有聽山堂集佳句如小屋埋林暗空江出樹明背城野

色貧家菊着樹寒光破屋煙嘗與杜茶邨合刻五律各五十首

揖堂云張岸齋先生鴻烈於書無所不讀下筆千言立就以己未鴻詞科授檢討甲子歲上疏請開黃河兩岸洩水支河及停採柵木事以不應密封部議左遷大理寺寺副未幾採柵工罷而總河靳輔據檢討疏自清口至宿遷皂河開新河三百餘里今之黃營中河是也山陽自宋理宗嘉定間迄今五百餘年未有本邑專志乃創修縣志垂十年始就乾隆乙巳所修志皆本先生之書爲之也先生有曲江樓集淮人詠淮詩渡江草等作皆未之見今就揖堂所錄者如釣臺懷古兒背盡馬二詩皆奇偉殆卽詠淮詩中所有者余前遊柳衣園後有高樓聳峙危而不傾曲江樓匾額在焉始疑程氏不

當以此名樓今知其仍先生之舊稱然未知卽其地否也

閻百詩先生以研經博物爲一代學者之宗而詩特雅麗遇
漁莊云夾岸水紅花舟行逐港斜漸無人識處祇有網爲家
溪上涓涓月潮平片片霞願言秋賽近酌酒話桑麻悼亡云
性貞猶帶豔心小祇容憐是亦廣平之梅花賦也

邊壽民維祺以畫蘆雁得名有自題一絕云鴨背灘頭幾曲
沙棲鴻安穩似歸家愁他風雪無遮護多寫洲前蘆荻花殊
有風趣他題者未能及是

秋風多悲秋士易感以失意之人遇搖落之候其爲抑塞更
可知已每科場之歲重九前後皆士人動魄驚魂之時阮綏
堂先生學浩有閩重陽對菊有詠柬下第友人詩六首最爲
淒緊今錄其三云籬外全凋綠草茵數叢蕭瑟稱閒身斜陽

疾似孤飛雁落葉紛於失意人耐冷我諳秋氣味放晴天與
菊精神十年醉醒黃花徑更倩清霜一浣塵登高歲歲插茱
萸重過山園影不孤到眼光陰還此日側身天地自吾徒嵐
深壘嶂畱雙屐風埽殘英剩幾株老去惜花差未減濃香壓
帽漫踟躕依然別圃委荒苔瘦格清標未易才已過三秋花
復吐恰逢九日客還來蒼林碧峴成前度白眼青天又一回
岸幘西風尋亦得不須隨例倒金罍先生早入翰苑此詩當
是少年瓊操之作讀之令人欲喚奈何也長子吾山少寇葵
生博物工文風流文采至今人猶思之其遲紫坪未歸云目
斷西陵積靄邊遊裝九月尚流連眞成湖上煙波客苦戀江
南橘柚天別圃經時無客到小樓遲爾對牀眠清霜一夜寒
初劇未省秋衣疊楚縣題王振西行春圖云萑葉初斂柳乍

絲一聲布穀喚林枝擔鋤荷笠邨邨路畫出儲王雜興詩寄
興纏綿吐辭秀曼不媿風人吾山有詩文集甚夥惜無有刻
者惟茶餘客話行焉

任東澗瑗舉丙辰鴻博不就揖堂稱其篤于經學潛心宋儒
之書年老窮愁歌聲若出金石遊金山寺云峯孤路欲斷江
抱屋如浮卽事云滿眼無前輩關心祇舊編蒲音庵云風細
磬聲傳鳥夢月斜松影上僧衣溫雅無俗調

山夫先生深于六書金石之學終身畢力於此有說文引經
考六書述部敘考金石存等書間皆爲波臣取去可惜也其
春暮懷人云作惡東風盡日吹又將春去向天涯短檠獨聽
三更雨孤枕難安一字詩久客不堪多病後懷人偏在落花
時山中櫻筍今應熟夢裏從君一舉卮遣悶云乳燕頻來蘸

淖波遊絲飛絮奈愁何人過四十風情減客到三春舊夢多
馬角功名真誕謾鵝籠身世易蹉跎日長惟仗鈔書力送盡
雙丸似擲梭他如板橋霜滑少人跡古渡月斜多雁聲雪嶺
不逢南去雁風林難定後棲鳥煙花北里橫塘外金粉南朝
落照邊水閣依然餘舊夢僧樓重到識前緣掩抑之詞悱惻
之調讀之者知非一日食麪一日食不託者也先生有忠武
軍符歌爲錢唐黃松石賦序云松石得古銅圓印徑不及寸
刻一人馳馬負胡蘆松石曰此背嵬軍符也按宋史韓岳皆
有背嵬軍范石湖云燕中謂酒餅爲嵬其大將酒餅皆令親
隨人負之故號背嵬韓與金人戰於大儀命背嵬軍士各持
長斧上搃人勾下斫馬足岳公於潁昌以背嵬八百於郾城
以背嵬五百皆破金人十餘萬而岳公子雲將背嵬軍手殺

兀术婿夏金吾背鬼軍之勇冠於諸軍是符爲韓爲岳皆不可知制度古樸色純碧可愛松石將以歸之岳祠云云此歌悲壯激烈以詞長不錄錄其序以記古物云爾

山夫長君冠雅名初枚詩筆亦工五言如海氣猶蒸日雲邊已挂星選勝客初健看山眼倍明七言如登鳳陽城樓云清時山外無風鶴落日平原放馬牛語皆警策

隨園最服膺程魚門先生故其贈詩云平生絕學多參遍第一詩功海樣深惜載園稿未得厲日嘗以爲憾者舊詩中所錄不多然亦可見大槩矣五古有宿焦山石壁庵七古有題畫鷺寄商寶意以盆松贈袁簡齋晚甘園凌霄花歌出入杜韓劉灘頓挫有光英朗鍊之觀近體清邁高華卓然大雅聞鐘云到耳生微聽鐘聲出遠林似隨流水影能引入山心響

絕頗疑續旨深如可尋月寒煙盡處應向此中沈秋日過菰
蒲曲感懷族伯父水南先生云當年茹歎鵬承塵衰草重披
重愴神宰樹拂雲都作勢驚禽翔影更無人性情清澈原非
福風雅評量自有真幸得諸兄守遺澤詩書門戶不憂貧有
懷韓伯慧云清淮握手暫逡巡鬢髮驚看漸染銀文物雕鏤
虧福命江山蕭瑟老才人孤琴泛雪誰傾耳雄劍如虹自繞
身歸去蘇閭門巷冷綠槐深映舊家春覆瓿詩云揚州西去
片帆程誰道輕舟夜忽傾制命不須滄海闊洗心先試暮流
清詩書失後懷佳本戚友來時話再生莫歎遭逢磨蝎重世
閒風浪幾曾平客船高駕類艤艫南北相持力不同絕叫已
驚身在水舉頭猶見月如弓全身別有慈雲筏作難原非少
女風隻履飄然歸去遠轉從幻業悟諸空舟人搏額哭偏哀

嫡女孱妻命遽摧新婦竟隨何伯去老夫纔問水濱回宮袍
捉月飛仙迹古殿摘文曠世才端賴此生詩筆弱乖龍原不
愛凡材先生生平事迹隨園記述詳矣且海內知名不必贅
云

余幼習舉業時知有周白民先生振采聞其偃蹇場屋而名
滿天下後見歸愚別裁集始知其能詩乃此集所錄亦僅別
裁中之二首豈詩本不多抑散佚無可考耶其老將詩云敵
人俛首驚無恙法吏吹毛對若讐殆爲自家寫照可以慨然
太息

兩薛君一名慎號廉邨一名懷號竹居以桃源籍居山陽爲
邊壽民宅相兩君皆工詩竹居兼善繪事得無忌之似廉邨
有見柴邨上人山水有感一律云舊時騷雅地方外亦名流

此日風期遠高齋圖畫畱人生無一伎誰信有千秋幾度振
吟抱吾徒空白頭其託意蓋不薄矣贈內一絕云分取銀鐙
半面光工夫春夜各慙忙停針輒語殷勤約繡綫一莖書十
行風趣正雨不乏竹居歸舟遣興云束裝薄暮向河干木落
鴻飛感歲殘事到客中如意少家從別後欲歸難兼天風浪
乘潮涌隔岸雲山帶雨看坐對短檠聽刻漏寂寥惟恨夜漫
漫舟泊京口雨夜夢兄云三更枕上夢初回驚起披衣感更
衰到死心猶戀子季不辭風雨過江來讀此知其友于之誼
篤矣又上元送吳山夫丈云習習東風上柳絲那堪便唱渭
城詞生憎趙嘏樓頭月第一回圓照別離亦佳

吳之榕中秋云半生虧處多於月一片孤懷冷似秋從第之
椿送人云亂山客路經年夢野水征帆六月秋皆佳句也二

吳皆海州人而籍山陽者又邱兢除夕句云百歲光陰兒日
好一家情話此時多亦婉妙以上皆從耆舊集中鈔出

水南老人令嗣晴江有送劉林一歸白下云不意君行至甫
來君又歸數句檐雨共一路柳花飛多病須諳藥藏機可掩
扉故園松桧在應長舊時圍姪輩江書逸民詩後云車揭飄
風奈若何運移士節倍蹉跎滄桑不變田橫島宮徵難諧易
水歌芒屨愁雲屯日月樵山血淚老關河重吟細把還嗚咽
隱隱寒濤響白波二首具見風骨世其家兒者也

山陽孝廉劉易偕名時吾友已山之師也已山言其督教循
循不作經師面目所以期望甚厚深以負此雅意爲媿因出
其叢殘詩稿相示雖非深于此事者然性靈流露時有雋永
邗江雜詠云繫纜灣頭月黯然一鐙孤館照愁眠行人聽盡

瀟瀟雨何處青樓不管弦海雲東望楚山低蕪館陰陰叫午
雞明月二分簾十里我來偏賜落花泥他如別如滄海帆先
住話到蓬山燭未灰兒頑贏得題凡鳥妻老其如病伯鸞皆
非學究語也

山陽許謹齋黃門志進風裁稜稜曾劾兩江制府噶禮貪縱
不法一時直聲動朝野其他封章造郝卓卓不阿卒以迂權
貴意乞歸有虛槎集及戊子以後至己亥編年詩匠門俠君
皆爲之序極爲推重黃門出漁洋門下詩格亦畧相似五七
古皆唐音沈鬱悲涼礫卓兀異惟音節未能悉諧近體渾成
清逸兼饒風趣贈蒼厓太僕云白髮京華舊棲遲水國東頭
衙卿士月身世馬牛風蟹舍三公府雞皮八十翁空餘憂國
淚沾灑向蒼穹黨部寬朝論清門遺世賢升沈看諫草感慨

入詩篇耆舊靈光在風流洛社先青緇名士業文筆大如椽
泰安道中云靈岳開東帝嵒巖望岱宗雨將青嶂洗天以白
雲封練馬渾難辨岩巒知幾重何當登絕頂長嘯俯諸峯河
口夜泊云暮山寒一碧江水淨無聲浩月初更上疎星幾箇
明清詩吟玉局美酒破烏程醉問尋山路眞成夢裏行六峯
道中云重岡複嶺勢縈迴煙景迷人百里來草色侵天經雨
碧梅花如雪遶城開鍊峯雲氣環仙鼎冶浦春流護將臺只
尺舊京三輔地憑高攬勝獨裴裒晚泊云江流一碧照人清
魂夢猶耽下瀨驚地險不妨酬一死壯遊差足快平生行依
錦繖雲幢路坐聽鈞天廣樂聲黯澹灘頭無恙過關干北斗
蘸空明寄內云深邨一月海西涯看盡朝雲與暮鴉幾夜夢
歸知憶我十年投老怕違家玳梁哺子憐嬌燕風榭移幡護

好花惆悵費長吟倦意玉瓶煎水試新茶他五言如八寶舟
中云柳疏黃浦月稻熟白田秋三汊河云春星隨岸轉江月
送潮來梁溪道中云雲邊見孤塔樹裏認煙鬟蘭谿云粉堞
明如繪山樓曲着行七言如入都畱別云少婦愁添新別恨
老成勸學慎言人揚州云鏡裏山光迷畫舫擔頭春色問圓
花三河晚泊云畫角呱呱如雁塞烏篷落落似漁邨和人云
畫地易成名士獄幕天真作酒人居贈別云縞帶朋歡風自
古雀羅門巷雨來今欲去云映水蠻花關客恨背人征雁說
鄉愁訓屏山云堂前醉石兼醒石堦下桐孫映竹孫大佛頭
云金仙夢裏纔歸漢石佛山中已過秦絕句如看花過劉伶
臺云醉死誰能問六骸春遊且復趁青鞵花間縱有劉伶鍾
滿地春愁不可埋涇邨卽事云稻秧針水麥初熟楊柳梳風

鰕正肥記取涇南好煙景林塘四月野花飛妙巖亭云靈岩
冷落西施跡鶴市銷沈吳女墳猶有六朝金粉恨夜深環佩
響秋雲江皋雜詠云不惜青鞵踐碧苔春懷特爲好山開江
干莫問路多遠只揀梅花深處來置之阮亭集中亦合作也
黃門賦性簡敖動多違俗詩中亦時露偃蹇槎枒之意爲里
中所疾至府邑志中不載其姓名可一喟也

黃門侍姬玉岑金陵殊色也亦能吟詠集中附其數首皆清
麗婉約黃門飼蠶詞云幾夜畱鐙照獨眠蠶房齋禁太常偏
軒渠借問秦淮海箇出蠶書第幾篇姬和云重帷篝火護蠶
寒晝永慵多午夢酣睡起裁詩先匿笑綠窗人自嬾於蠶和
姑蘇柳枝詞云帶雨籠煙映淺流小蠻無力比輕柔憐他二
月鴛梭巧織就吳波一段愁豔說濺裙水畔時新聲重播義

山詞從君要識春深淺驗取臨風第一枝黃門築來鳳以居之見者以爲珍鳥翡翠之在雲路矣

有以金陵羽士朱福田嶽雲詩鈔見眎者卷首有先師惜抱先生一序謂其平生好爲詩仰希太白閎之清超不俗如樹深亭未辨岩際鳥初飛江雲昏欲雨空翠澹成秋山木懸江雨吳雲入楚秋霜菊澹無影風荷乾有聲老屋恰臨水故人方倚門秋水有危約夕陽無近山皆有唐人風格七言如花氣一林初過雨春寒二月轉添衣太白樓云千秋過者誰高詠一斗陶然我欲眠天門阻風一絕云天門中斷阻舟還葦岸無窮接港灣一角夕陽西向盡沈沈姑孰雨連山余尤賞其翠微亭一聯云老衲獨投蕭寺去寒雅爭傍孝陵飛許孝廉月南復以詞彙見眎清詞麗句正不減溫韋灘破沈

谿沙云子舍歡言爇炷長粧臺溫語粉痕香說着秋聲嫌冷
淡況他鄉風打窗櫺推夢醒雨淋檐角說天涼此刻爭能家
不憶又重陽沁園春詠愁云最長睂自畫纔梳頭後空房獨
返未上鐙時減蘭詠黑云重帷深掩小膽惺惺鐙未點莫愛
烏紗拋得春風兩鬢鴉詠紅云桃花顏色淡淡衫兒新染得
霞暈微烘知是羞容是醉容皆可入伽陵之室

沈芷橋炤吾吳詩人少喜爲豔體極纏綿悱惻之致尤長於
詞頃自吳門來出月夜度江水調歌頭一闕見示云江口月
初上瓜步正潮生空明天水澄鏡行矣快揚舲試問金焦兩
點閱盡過江人物着眼爲誰青便欲弄長笛喚取老龍聽風
方利吟初就酒微醒恍聞舞空鸞鶴夜靜塔鈴清更儼中流
容與滌我詩腸冰雪和月汲中冷回首海門闊長嘯謝山靈

清雄爽朗睥睨辛劉他如臺城路題秋館聽潮云商飈先入
江頭樹刁騷已盈清聽月墮空煙潮迴極浦滾滾更傳秋信
鄉心易警算咫尺家山歸仍難準并入長宵羈入剗枕鎮常
醒年來也同梗泛孤舟聞斷雁沙觜頻等轉眼煙雲過江人
物部分此聲淘盡臨流試問便擊楫乘風阿誰先證俊氣銷
除披圖先自省小令菩薩蠻雙燕圖云年時見爾深深苑柳
昏花暝歸飛倦畱爾看梳頭朝光晃畫樓重來春已遠簾也
無人卷憑爾訴春愁花陰閒玉鉤餘句如贈文蘭云翠尊誰
共欸有纖蛾桂葉小字蘭修玉簫代語新譜倚徧梁州一朵
仙雲畱駐過斜陽猶漾簾鉤燕泥云別有樓深簾悄和隔歲
歌塵冷誰埽皆有姜張風調又南鄉子云楊柳初三月梨花
昨夜風夕陽移過畫闌紅腸斷斷無人處舊簾櫳蕙徑迷羣

秋苔堦歇屐弓楊花無語忒惺忪剛被游絲攔住攪晴空自
謂仿飲水詞體正復不減

芷橋以其故人崇明祝湘珩積小齋詩見謂曰祝君號介亭
以疾偕其婦陸靜窗僑居吳門日惟伏枕苦吟以詩爲消遣
惜以沈疴早卒年僅三十餘夫人教子有方其嗣已登丙子
賢書矣余閱其詩多呻吟抑鬱之言旅思云客館半年住鄉
關一夢通愁心共春水流過大江東斜月橫窗白殘燈背壁
紅親朋凝望久書信託征鴻閒吟云春草綠閒房無言春晝
長風吹半窗兩人對一鑪香幽意盡懸壁正聲琴在牀年來
惟習靜心地稍清涼他如病消豪士氣靜有老僧心腕疲斜
舉筆髮脫亂隨梳桃花拂檻燕初乳柳絮入簾鶯亂飛閨餘
節序驚秋早別後鄉園入夢非眼雖假睡心難睡身未能歸

夢易歸虎阜雜詩云畫樓橫笛午風和遊客關情此地多六
載藥鑪經卷畔春光不到病維摩讀者哀之有家僮石嶼詠
盆松云老幹不盈尺霜來也作花君見之卽焚券以婢配之
遺研樓小集元和朱綬環之所作亦芷橋詩友也好爲古樂
府古今體亦皆規模高格不作佻輕淺易之語攝山秋夜云
秋月不在地叢碧亂人影夜風吹衣袂山葉蹋逾冷燈光出
疏竹知有僧未寢不聞梵唄聲饑鶴時一警落葉云空室自
生警澹煙如有痕雪中云浦雲低去雁風樹定昏鴉春雨云
如聞闌夜曲欲病少年人西湖秋柳詞云垂楊垂柳苑牆邊
無復嬌鶯泥管絃水殿雲廊秋一色玉笙吹夢雨如煙年前
孤負冶春期小立湖塢感鬢絲依舊第三亭子上亂鳥啼冷
月斜時皆工